

樊川文集

黃

70

樊川文集第十八

中書舍人杜牧字牧之

李訥除浙東觀察使兼御史大夫制

勅仲尼以舉賢才則理大禹以能官人則安況
西界淞河東奄左海機杼耕稼提封七州其間
繭稅魚鹽衣食半天下不有可仗豈宜委之正
議大夫使持節華州諸軍事守華州刺史兼御
史中丞充潼關防禦鎮國軍等使上柱國隴西
縣開國男食邑三百戶賜紫金魚袋李訥溫良
恭儉齊莊中正實以君子之德華以才人之辭

揚歷清顯昭彰令聞輟自掌言式是近輔子貢
爲清廟之器仲弓有南面之才智莫能欺剛亦
不吐表率教化皆有法度今者兵爲農器草作
軒車言於共理在擇循吏是故用已效之績託
分寄之任擁舊旆而服玄玉化千里而有三軍
儒者之榮莫過於此孔子曰仁者愛人智者知
人愛人則疲羸可蘇知人則才幹不棄土宇旣
廣殺生在我考此二者可以報政榮加副相用
堅大邦爾其勉之無忝所舉可使持節都督越
州諸軍事守越州刺史兼御史大夫充浙江東

道都團練觀察處置等使散官勲封賜如故

盧搏除廬州刺史制

勅夫立人伯長此周文王所以敬事上帝也況廬江五城環地千里口衆賊重豈可輕授朝議郎守尚書刑部郎中柱國賜緋魚袋盧搏以文學策名才能入仕周歷臺閣嘗宰繁劇鬱有佳譽兼報善政今者出郎官之帳懸太守之章言於清時不爲不遇上有命則違之上有好則效之此乃成王命君陳之言也故行令不如行化律人不如律身念茲二者可長人矣無忝分寄

爾其勉之可使持節廬州諸軍事守廬州刺史
散官勲賜如故

李文舉除睦州刺史制

勅夫三尺律令人情出於中耳苟情有不可亦
法無本條正議大夫權知宗正卿上柱國隴西
縣開國伯食邑七百戶賜紫金魚袋李文舉宗
室子孫初以地進累居官次皆著能名是以取
自遠藩擢爲宗正大則提舉群吏灑掃守奉次
則整訓屬族次第昭穆唯此二者爾之職焉今
則狂盜公然侵犯陵寢毀墳之罪已坐首令責

師之義固難矜寬勉於分憂足以補過可使持節睦州諸軍事守睦州刺史散官勲封賜如故仍馳驛赴任

竇弘餘加官依前台州刺史蘇莊除鄧州刺史等制

勅朝散大夫使持節台州諸軍事守台州刺史上柱國竇弘餘朝議郎前使持節虔州諸軍事守虔州刺史上柱國賜緋魚袋蘇莊等南郡盜作而蕭育拜河內政美而寇恂留爲人擇官因重而撫考於兩漢行古道也弘餘廉使上言父

老有請其爲政也長育多方惠訓不倦凡設教
令皆有科指莊任南康悉心爲理謹身律下節
用愛人南陽古都近者小擾臨海越俗尤惜良
吏就加超拜各叶所宜仕至二千石可比人矣
無異文律不自貴重副疲羸之望者須念始終
坐狂愚之罪者勿理深污各膺寵祿無忝分寄
弘餘可檢校太子右庶子餘如故莊可使持節
鄧州諸軍事守鄧州刺史散官勲賜如故

李暨除絳州刺史魏中庸除亳州刺史
曹慶除威遠營使等制

勅中散大夫使持節亳州諸軍事守亳州刺史
充本州團練鎮遏使雲騎尉賜紫金魚袋李暨
等昔貞觀末遣孫伏伽等二十二人各以六條
巡察郡縣以能進者止二十人獲死者七人流
竄黜免僅千百輩以太宗皇帝上聖憂勤之切
百執事奉法公謹之心守臣爲姦如此之衆况
今黜陟久廢仕進多門緬思疲人每渴良吏牧
守之念予常軫懷暨實文士出典兵郡不薄爲
吏愛我百姓盜賊姦宄寢而不作鰥寡孤獨皆
有所養中庸再分符竹聞立善政凡爲理者皆

高仰之今用已効之才各委共理之任簿書刀
筆俗吏事耳慈惠教化君子宜之二者較然爾
欲何取慶乃身帶兩綬兵分禁營得佩牛刀立
於交戰或有鄉里之譽克肖友悌之風百里長
人在王畿內各思荅效無忝寵榮可依前件

李誠元除朔州刺史制

勅銀青光祿大夫檢校國子祭酒前使持節都
督勝州諸軍事兼勝州刺史御史中丞充本州
押蕃落及義勇軍等使上柱國李誠元開元時
吐蕃上書悖慢無禮皆邊將造僞交關華夷異

立功勲以求爵賞自長慶已降怠於制置西北
守帥多非其人侵虐種落厚自封殖至使忿驚
之性不甘欺奪之若近者聚爲內寇至乃騷動
天下因令循撫果效信順是以屢詔執事慎於
選求僉曰誠元家本北邊志氣慷慨將軍之子
頗傳父業學万人敵知四夷事跡榆林之前政
寄馬邑之名邦仍留兼官用震殊俗夫車馬甲
兵戰之器也禮樂慈愛戰所蓄也然後要之誠
信禦以堅明雖曰戎夷豈不畏服深期國士無
顏家聲可檢校國子祭酒使持節朔州諸軍事

兼朔州刺史御史中丞散官勲如故

薛逵除秦州刺史制

勅兵者凶器也將者死官也若不擇才必有陷
敗銀青光祿大夫檢校右散騎常侍使持節隴
州諸軍事兼除州刺史御史大夫充本州防禦
使上柱國薛逵匈奴犯塞李廣逢時爪牙甚堅
翅翼頗健任以汧隴倚戎一本作盡節守封當賜輒分
軍租不入士爭爲死虜不敢犯今以天水名郡
踰爲新都用汝守之期於鎮靜無召戎生事無
翫兵邀功正封疆守禮信險走集嚴候伍邊將

之道莫過於斯弄印貂冠皆爲榮秩壯爾軍旅
惟恐不多勉礪鋒鋦以期報效可檢校左散騎
常侍使持節秦州諸軍事兼秦州刺史御史大
夫充天雄軍使兼秦成兩州經略及義寧軍行
營鎮遏都知兵馬使本道營田等使散官勲如
故

田克加檢校國子祭酒依前宥州刺史
制

勅銀青光祿大夫檢校太子賓客使持節宥州
諸軍事兼宥州刺史御史中丞充經略軍使押

蕃落副使左神策軍宥州行管都如兵馬使上
柱國鴈門郡開國侯食邑一千戶田克臬俊無
敵感激輕生李信之氣蓋關中陳安之勇聞隴
上委以邊郡能得士心寇圍陰河守陴甚寡爾
乃萬死不顧一奮無前奇兵徑衝驍騎橫挑圍
開孤壘戰敗豪羗言念忠勞豈愛爵賞帖以崇
秩用酬奇功畢萬疋夫也百戰皆獲有馬百乘
死於牖下死不在寇此乃趙鞅誓衆之辭也宜
念古人之言勉作萬夫之特可檢校國子祭酒
餘並如故

薛宗除鄧州任如愚除信州虞藏玘除
邛州刺史等制

勅朝議郎前使持節坊州諸軍事守坊州刺史
薛宗等仲尼對魯哀公曰人道之大莫先爲政
漢宣帝曰與我共治者其唯良二千石乎念先
師賢帝之言思疲人良吏之選夙興夜寐不忘
於此宗以文科入仕命守邊郡屬當伐叛兵於
其郊處劇不繁事叢皆辦如愚進以門子屢爲
長吏其有政化可差古人藏玘與逢閱官簿而
頗多言理名而亦著紹元嘗聞謹慎可宰百里

已所不欲勿施於人無忘格言副我優寄可依
前件

鄭液除通州刺史李蒙除陳州刺史等
制

勅朝議郎前守太原府晉陽縣令上柱國鄭液
等今之郡守爲人師帥宣上教化者也以液久
在官途嘗宰大邑聞其爲治人歌舞之以蒙執
爰前驅予之雄也光祿護塞居延視胡虜不敢
窺士爭爲死各委分寄實曰遷升通州雜以華
夷淮南兩有兵賦爾其往哉今用誠爾爲天子

之守臣作百姓之長吏言於仕進可曰顯榮夫
君子之道先有諸已後求於人苟能律身始可
檢下勉詳詔令用謹理行從規始於門子入仕
恭謹無尤自州佐而升在朝班列五尚而職三
服亦爲良遇無忝官常可依前件

王晏實除齊州吳初本巴州陳誕渝州
刺史等制

勅正議大夫前使持節涪州諸軍事守涪州刺
史上柱國太原縣開國男食邑五百戶賜紫金
魚袋王晏實等俟善政而後用或蔑無所聞滯

序進之常途則怨生於下古今政柄患斯二者
晏實初本佺等三人入仕年多亦嘗爲郡聞無
悔吝是熟詔條濟南跨河有兵有賦巴渝夷俗
慷慨豪健刑於樂典爾其往哉古之人有言曰
子苟爲善誰敢不勉身率以正孰敢不正欲謹
於行在於廉平弘宗溫慎有餘王屬咸爲清秋
銖以文學嘗佐賢侯作掾京兆亦曰美仕皆有
官業慎無自薄可依前件

郭瓊除渠州郭宗元除興州等刺史王
康除建陵臺令等制